

2008-imi ilassutitut aningaasaliissutitut inatsisissatut siunnersuut

pillugu

Aningaasaqarnermut Ataatsimiititalia

ISUMALIUTISSIISUTAA

inatsisissatut siunnersuutip aappassaaneerneqarnerani saqqummiunneqartoq

Aningaasaqarnermut Ataatsimiititaliap ilaasortai ukuupput:

Inatsisartunut ilaasortaq Naaja Nathanielsen (Inuit Ataqtigiit), siulittaasoq

Inatsisartunut ilaasortaq Niels Thomsen (Demokraatit), siulittaasup tullia

Inatsisartunut ilaasortaq Per Berthelsen (Siumut)

Inatsisartunut ilaasortaq Aqqaluaq Egede (Inuit Ataqtigiit)

Inatsisartunut ilaasortaq Finn Karlsen (Atassut)

Imarisaanut nalunaarsuut::

1. <i>Aallaqqaasiut</i>	4
2. <i>Namminersornerullutik Oqartussat missingersuutaat pillugit Inatsisartut inatsisaat nr. 8, 29. oktober 1999-meersoq – missingersuusiornermut inatsit</i>	4
2.1 <i>Aningaasaleeriaatsit</i>	5
2.2 <i>Aningaasaliissuteqartarnermi tunngaviit</i>	5
3. <i>Aningaasaliissutit pillugit missingersuusiornermut inatsimmi aalajangersakkat</i>	6
4. <i>Ilassutitut aningaasaliissutinut inatsit</i>	6
4.1 <i>Aningaasaliissutit iliuutsillu oqaasertaliussatigut aalajangersakkanik tunngavillit</i>	6
4.2 <i>Ilassutitut aningaasaliissutinut inatsisissatut siunnersuummik saqqummiussineq</i>	6
4.3 <i>Sulianik Inatsisartuni suliassanngorlugit innersuussisarnerit</i>	7
4.4 <i>Aningaasaliissutit inatsisitigut pisussaaffigisat isertitassatullu aningaasaliissutit</i>	7
4.5 <i>Aningaasaleeriaatsit allannguuteqartinneqarnerminni Aningaasaqarnermut Ataatsimiititaliamit akuersissutigineqartut</i>	8
4.6 <i>Maleruagassanik erseqqinnerusunik aalajangersaanissamut tunngavissat</i>	8
4.7 <i>Aningaasaliissutinik allannguinnissamik qinnuteqaateqarnissamut piumasaqaatit</i>	8
4.8 <i>Ilassutitut aningaasaliissutinut inatsisip imarisai</i>	10
5. <i>2008-imi Aningaasaqarnermut Ataatsimiititaliamut aningaasaliissuteqarnissamik qinnuteqaatit</i>	10
6. <i>2008-imi aningaasanut inatsit aamma 2008-mi ilassutitut aningaasaliissutinut inatsisissatut siunnersuut – kisitsisit pingaarnerit aningaasaleeriaatsinullu agguataarinerit</i>	12
6.1 <i>Kisitsisit pingaarnerit aningaasanngorlugit</i>	12
6.2 <i>Ilassutitut aningaasaliissutit (inatsisissatut siunnersuummi § 1) – allannguutit oqartussaasunit assigiinngitsunit pingasunit akuersissutigineqartut</i>	12
6.2.1 <i>Naalakkersuisut oqaasertaliussamut innersuussillutik akuersissutigisaat</i>	13
6.2.2 <i>Inatsisartut Aningaasaqarnermut Ataatsimiititaliaannit akuersissutigineqartut</i> .13	
6.2.3 <i>Inatsisartut Suleriaaseq pillugu Ataatsimiititaliaannit akuersissutigineqartut</i>	14
7. <i>Oqaasertaliussanik allannguinerit (inatsisissatut siunnersuummi § 2)</i>	14
8. <i>Konto pingarneq 20.11.50 – Ingerlatsinermut sillimmatit</i>	14
9. <i>Naalakkersuisut nuussinerinut Aningaasaqarnermut Ataatsimiititaliap oqaaseqaatai 9.1 Ataatsimut isigalugu</i>	15
9.2 <i>Aalajangersimasunut oqaaseqaatit</i>	16
9.2.1 <i>Sulisorisat pillugit paasissutissat</i>	16

9.2.2	Naalakkersuisuts godkendelse af rokeringer med tilbagevirkende kraft Minnerunngitsumik Peqqinnissaqarfik eqqarsaatigalugu Naalakkersuisut kingumoortumik atuutilersumik nuussinissanik akuersissutiginninnerat	16
9.3	<i>Naalakkersuisut aningaasaliissutinik nuussineranni inatsisitigut tunngavissat</i>	17
10.	<i>Aningaasaqarnermut Ataatsimiititaliap inatsisissatut siunnersuummut oqaatigiuma-sai allat</i>	17
10.1	<i>Nalinginnaasumik oqaaseqaatit</i>	17
10.2	<i>Inatsisissatut siunnersuummi kukkunerit amigaatillu aalajangersimasut</i>	18
10.2.1	<i>Ilanngussaq 1 aamma nalinginnaasumik nassuiaatit</i>	18
10.2.2	<i>Ilanngussaq 2, 2008-imut oqaasertaliussanut allannguutit</i>	19
10.2.3	<i>Missingersuutitut ilanngussat</i>	19
10.3	<i>Aningaasaliissuteqarnissamik suliassanut ataasiakkaanut oqaaseqaatit</i>	20
10.3.1	<i>Arctic Green Foodip sullissinissaq pillugu isumaqatigiissuteqarfigineqarnissaata akuerineqarnissaanik qinnuteqaat (08-308)</i>	20
10.3.2	<i>Danmarkimi nunanilu allani misileraatigalugu katsorsaanermut aningaasaliissuteqarnissamik qinnuteqaat (08-313)</i>	21
10.3.3	<i>Narsami toqoraavimmud atasumik suliniutitut nutaanut sillimmatinit aningaasat atugassiissutigineqarnissaat (08-347)</i>	22
10.3.4	<i>Peqqinnissaqarfimmud ilassutitut aningaasaliissuteqarnissamik qinnuteqaatit (08-313, 315, 316, 321, 349, 355, 359, 360, 369, 374, 383 aamma 397)</i>	22
10.3.5	<i>Qasigiannuani efterskolip suliariumannittussarsiuunneqarnerata kingorna ilassutitut aningaasaliissuteqarnissamik qinnuteqaat (08-370)</i>	23
11.	<i>Aningaasaqarnermut Ataatsimiititaliap kaammattuutai</i>	24
12.	<i>Aningaasaqarnermut Ataatsimiititaliap inassuteqaatai</i>	25

Ilanngussat

Ilanngussaq A	Aningaasaqarnermut Ataatsimiititaliap 2008-imi aalajangiiffigisai Naalakkersuisunit il.il. akissutinik ilallit. (Suliaq nr. 08-306 – 08-398)
---------------	--

1. **Aallaqqaasiut**

Inatsisartut 2008-imi ilassutitut aningaasaliissutitut inatsisissaattut siunnersuut Aningaasanut Naalakkersuisunit Inatsisartut 2009-mi ukiakkut ataatsimiinneranni saqqummiunneqarpoq. Inatsisissatut siunnersuut siullermeerneqarami Aningaasaqarnermut Ataatsimiititaliamit suliarineqartussanngorlugu innersuunneqarpoq. Inatsisissatut siunnersuut Aningaasaqarnermut Ataatsimiititaliap suliaraa matumuunalu Inatsisartut inatsisissatut siunnersuummik aappassaaneerinissaannut isumaliutissiisuteqarluni.

Aningaasaliissuteqarnissamik qinnuteqaatit Naalakkersuisunit ukiup siuliani tiguneqartut ilaat isumaliutissiisummi matumani Aningaasaqarnermut Ataatsimiititaliamit paasissutissiisutigineqarput. Aalajangiinerit tamakkerlugit taakkunungalu atatillugu allaqatiginnissutit isumaliutissiisummut ilanngussatut A-tut ilanngunneqarput.

Aningaasaqarnermut Ataatsimiititaliap suliaata ilaanik pingaarutilimmik taamatut sukumiisumik issuaanikkut isumaliutissiisut una Aningaasaqarnermut Ataatsimiititaliap 2008-imi ukiumoortumik nalunaarutaatut taaneqarsinnaavoq.

Kiisalu aalajangiinerit Naalakkersuisunit nassiunneqarnerat ilutigalugu takuneqarsinnaasunngortineqarnissaat Aningaasaqarnermut Ataatsimiititaliap anguniartaraa oqaatigineqassaaq. Taamaalillutik aningaasaliissuteqarnissamik suliaassanut atatillugu Aningaasaqarnermut Ataatsimiititaliap ukiuni kingullerni aalajangiineri tamarmik <http://cms.inatsisartut.gl/ataatsimiititaliat/AningaasaqarnermutAtaatsimiititaliap/AningaasaqarnermutAtaatsimiititaliap> aalajangiinerisa ataanni nassaassaapput. Aalajangiinerit suliap normuata aammalu Aningaasaqarnermut Ataatsimiititaliap ulloq aalajangiiffigisaata kiisalu sammeneqartup ataani ilanngunneqartarput. Suliaq pillugu naammaginartumik paasissutissiisimannginneq allatigulluunniit amigaatit amerlasuutigut tunngavigalugit Aningaasaqarnermut Ataatsimiititaliap aalajangiinissaminik kinguartitsisariaqartarmat suliap normuata ataatsip ataani aalajangiinerit arlallit ilanngunneqarsinnaasarput. Taamaattumillu suliap normuata kingorna kisitsimmik allassimasoqartarpoq, tassuunakkut takutinneqartarluni suliami ataasiarluni, marloriarluni pingasoriarluniluunniit aalajangiisoqarsimasoq, soorluttaaq Aningaasaqarnermut Ataatsimiititaliap aalajangiinerata ullua nalunaarneqartartoq.

Aningaasaqarnermut Ataatsimiititaliap ataatsimiinnissani pillugit ukiumoortumik pilersaarusiortarpoq pilersaarullu taanna ataatsimiititaliap nittartagaani takuneqarsinnaavoq. Ataatsimiittarnissanut pilersaarutip Naalakkersuisunit ilisimaneqarlunilu ataqqineqarnissaa ataatsimiititaliamit naatsorsuutigineqarpoq.

2. **Namminersornerullutik Oqartussat missingersuutaat pillugit Inatsisartut inatsisaat nr. 8, 29. oktober 1999-meersoq – missingersuusiornermut inatsit**

Inatsisartut 1999-imi ukiakkut ataatsimiinnermini missingersuusiornermut inatsit akuersissutigaat. 2000-imi upernaakkut ataatsimiinnermi inatsimmi § 10 allanngortinneqarpoq, taamaalillunilu Inatsisartut aningaasanut inatsisaat ukiup aningaasanut inatsisip atuuffiata siuliani ulloq 15. november nallertinnagu akuersissutigineqartartussaavoq.

Missingersuusiornermut inatsisikkut missingersuusiornermi tunngaviit pioreersut aalajangersakka-tigut maleruagassiuunneqarput erseqqissarneqarlutillu, taakkunungalu ilaavoq Inatsisartut ukiumi aningaasanut inatsisip atuuffiani aningaasaqarnikkut tulleriiarinerata aningaasanut inatsimmi ataatsimoortumik ingerlanneqartariaqarneranik tunngavik.

- Aningaasaqarnerup naalackersuinikkut tamakkiisumik eqqumaffigineqarsinnaaneramik, aamma
- tamakkiisumik tamanut sammititamik tullerriiaarisarnissamik anguniagaqarneq aallaavigalugu taama tunngaveqarneq qitiusumik inissisimavoq.

Tamatuma malitsigisaanik ilassutitut aningaasaliissutitut inatsit maanna tassaalerpoq kingusinnerusukkut aningaasaliissutitut inatsit, ukioq aningaasanut inatsisip atuuffia naareeraangat akuersissutigineqartartoq. Ilassutitut aningaasaliissutitut inatsimmi Inatsisartut aamma Aningaasaqarnermut Ataatsimiititaliap siusinnerusukkut aalajangigaat aalajangersakkatigut maleruagassiuunneqartarput.

Missingersuusiornermut inatsit ulloq 1. januar 2001 atortuulerpoq, taamaattorli aalajangersakkat ilaat, soorlu sanaartugassanut iluarsagassanullu aningaasaateqarfiup pilersinneqarneranut tunngasoq aamma ilassutitut aningaasaliissuteqartarnerit pillugit aalajangersakkat ulloq 1. januar 2000 atortuulerput.

Inatsisartunut ilaasortat qinigaarlaanik ilaqarmata aningaasaliissutit, aningaasaliissutitik allannginnerit aningaasaleeriaatsillu assigiinngitsut pillugit missingersuusiornermut inatsimmi aalajangersakkanik Inatsisartut eqqumaffigineqqullugit minnerunngitsumillu aningaasaliissutit Inatsisartut aalajangigaat ataqqineqaqullugit missingersuusiornermut inatsimmi aalajangersakkat qitiusut ilaasa isumaliutissiisummut matumunnga ilanngunneqarnissaat pisariaqartinneqartutut Aningaasaqarnermut Ataatsimiititaliamit isigineqarpoq.

2.1 Aningaasaleeriaatsit

Missingersuusiornermut inatsisip imarai aningaasaleeriaatsit assigiinngitsut aalajangersakkatigut maleruagassiuunneqarlutillu erseqqissarneqarnerat aamma aningaasaliissutit atorineqarnissaannut maleruagassat kiisalu aningaasaliissutit nutaat allanngukkallu assigiinngitsut aalajangersakkatigut maleruagassiuunneqarnerat. *Aningaasaleeriaatsit* makkuupput:

- ingerlatsinermut aningaasaliissutit
- tapiissutitut aningaasaliissutit
- aningaasaliissutit inatsisitigut pisussaaffigisat
- sanaartornermut aningaasaliissutit, aamma
- isertitassatut aningaasaliissutit.

Missingersuusiornermut inatsisip nassataraa sanaartornermut tunngasuni sanaartugassanut iluarsagassanullu aningaasaateqarfimmik, missingersuusiornermik tunngaveqartumik pilersitsisoqarnera, tamatumalu kingunerisaanik pissutsit teknikimut tunngassuteqartut aningaasaqarnikkut sunniutaat, soorlu sanaartornerit ingerlanneqarnerisa sukkassusaasa allanngorneri aamma sanaartukkanut aningaasaliissuteqaqinnissat pillugit apeqqutit, aningaasaliissutitut inatsisini ilanngunneqartartussaa-junnaarput.

2.2 Aningaasaliissuteqartarnermi tunngaviit

Aningaasanut inatsimmi missingersuutitut ilanngussani tamani *Aningaasaliinermi tunngavigineqartut* ataanni aningaasaliinermi tunngavigineqartut erseqqinnerusumik paasisutissiisutigineqartassapput, ilaatigut:

- Aningaasaliissutit kingusinnerusukkut atugassanngortinneqarnissaat, aamma
- naatsorsuutit inaarsaanermut atatillugu aningaasaliinermi tunngavigineqartut qanoq eqquutsinneqartigisimanerannik nalilersuisinnaanissap periarfissaqarnissaa siunertaralugu.

3. Aningaasaliissutit pillugit missingersuusiornermut inatsimmi aalajangersakkat

Missingersuusiornermut inatsimmi § 1, imm. 3-mi aalajangersarneqarpoq:

Aningaasaliissuteqarnissamik sioqqutsisumik akuersissuteqartoqareertinnagu aningaasartuuteqarnanilu aningaasanik atuisoqarsinnaanngitsaq.

§ 3-mi aalajangersarneqarpoq:

Aningaasaliissuteqarneq Naalackersuisunut ilaasortap aalajangersakkat erseqqinnerusut malillugit aningaasanik atuinissaanut piginnaatitsissutaasoq. Naalackersuisunut ilaasortaq sukkulluunniit Naalackersuisunut ilaasortaasoq Naalackersuisoqarfimmut pineqartumut aningaasaliissutinut akisussaavoq.

4. Ilassutit aningaasaliissutinut inatsit

4.1 Aningaasaliissutit iliuutsillu oqaasertaliussatigut aalajangersakkanik tunngavillit

Missingersuusiornermut inatsimmi § 25 - § 29-mi aningaasaliissutit nutaat allannortitalluunniit pillugit aalajangersakkat malittarisassiuunneqarput, taamaalillutillu *Ilassutit aningaasaliissutinut inatsimmi* aalajangersakkat tunngaviusut taakkunani malittarisassiuunneqarput. § 25, imm. 1-imi aalajangersarneqarpoq

„ukiup aningaasanut inatsisip atuuffiata ingerlanerani nutaanik aningaasaliissuteqarnissamut oqaasertaliussaqarnissamullu imaluunniit aningaasaliissutinik oqaasertaliussaniluunniit allannortitsinissamut piumasaqaataasoq Inatsisartut Aningaasaqarnermut Ataatsimiititaliaat Inatsisartut sinnerlugit akuersissuteqaaqqaarsimassasoq.“

Aalajangersakkakkut tassuuna ilaatigut erseqqissarneqarpoq aningaasartuutit aningaasanut inatsimmi tunngavissaatitaasunit allaasut Aningaasaqarnermut Ataatsimiititaliaq sioqqutsisumik akuersissuteqareersimatinnagu aningaasartuutigeqqusaanngitsut.

§ 26-mi aalajangersarneqarpoq

ukiup aningaasanut inatsisip atuuffiata ingerlanerani nutaanik aningaasaliissutigineqartut oqaasertaliunneqartullu imaluunniit aningaasaliissutit oqaasertaliussallu allannortinneqartut aningaasaliissutigineqarnermik kingorna ilassutit aningaasaliissutinut inatsimmut ilanngunneqartassasut.

Aammattaaq iliuutsit oqaasertaliussamik aalajangersakkatigut tunngavillit ilassutit aningaasaliissutinut inatsimmut ilanngunneqartartussaapput.

4.2 Ilassutit aningaasaliissutinut inatsisissatut siunnersuummik saqqummiussineq

§ 26, imm. 3-mi aalajangersarneqarpoq Naalackersuisut ilassutit aningaasaliissutinut inatsisissatut siunnersuut kingusinnerpaamik ukiup aningaasanut inatsisip atuuffiata kingorna Inatsisartut ileqqusumik ataatsimiinnissaannut siullermut Inatsisartunut saqqummiuttassagaat. Taamaalilluni pineqartoq tassaavoq aningaasaliissutaareersunut inatsit, Inatsisartut aamma Aningaasaqarnermut Ataatsimiititaliap siusinnerusukkut aalajangigaannik aalajangersakkatigut tunngavissiisoq.

Aningaasaliissutaareersunut inatsisip pineqarnerata kingunerisaanik 2008-mi aningaasanut inatsit aamma 2008-imi ilassutitut aningaasaliissutinut inatsit katillutik aningaasaliissutit oqaasertaliussallu 2008-mi atuuttut suunerinik takussutissiisussaapput. Taamaalillutik aningaasaliissutit 2008-mi aningaasanut inatsimmi aamma 2008-mi ilassutitut aningaasaliissutinut inatsimmi ilaatinneqartut, taakkunungalu ilanngullugit sanaartugassanut tunngasuni *suliassanut aningaasaliissutit, Nunatta Karsiata 2008-mi naatsorsuutaanut aamma 2008-imi Sanaartorneq pillugu Nassuiaammut tunnga-viupput. Nunatta Karsiata naatsorsuutai Sanaartornerlu pillugu Nassuiaat Inatsisartut upernaakkut ataatsimiinneranni saqqummiunneqassapput.*

4.3 Sulianik Inatsisartuni suliassanngorlugit innersuussisarnerit

Sulianik Inatsisartut Aningaasaqarnermut Ataatsimiititaliaata arlaannik pissuteqarluni isummerfigisinnaangisaanik isummerfigiumanngisaanilluunniit peqarsinnaasarpoq, soorlu suliaq tunnga-viulluinnartumik aallaaveqarpat, aningaasartai annertuppata imaluunniit Aningaasaqarnermut A-taatsimiititaliap Inatsisartut suliaq pillugu isumaat nalornissutigippagu. Tamatumani Aningaasaqarnermut Ataatsimiititaliap suliamik Inatsisartunut suliassanngortitsilluni innersuussisinnaaneranut periarfissaqarpoq. 2008-mi sulianik Inatsisartunut innersuussisoqanngilaq.

4.4 Aningaasaliissutit inatsisitigut pisussaaffigisat isertitassatullu aningaasaliissutit

Aningaasanut inatsimmi aningaasaliissutigineqartoq inatsisitigut pisussaaffigisaq ukiup ingerlanerani siunertamut tassunga aningaasartuutaajumaartutut naatsorsuutigisanik sapinngisamik pitsaanerpaamik *missingiinnermut* takussutissaasarpoq. Aningaasartuuteqarnissat immikkut inatsisiliani aalajangersarneqartarput, soorlu pensionisariatitassatut aningaasartuutissanut, aningaasanut inatsimmi aningaasaliissuteqarnersoq aningaasaliissuteqannginnorsorluunniit apeqqutaatinnagu pensionisartartinneqarsinnaasunut tamanut aalajangersimasunik aningaasartaqarlutik tunniunneqartartussanut, tunngatillugu taamaattoq.

Taamaalillutik aningaasaliissutinut inatsisitigut pisussaaffigisanut tunngatillugu aningaasartuuteqarnerussutit aningaasartuutikinnerussutilluunniit ingerlaannarlutik aningaasartuutigineqarsinnaapput ilassutitullu aningaasaliissuteqaataanissaat piumasaqaataanani. Aningaasaliissutinut naleqqiullugu allannguutit ukiumi aningaasanut inatsisip atuuffiani naatsorsuutini taamaallaat takuneqarsinnaapput.

Taamaallaat aningaasaliissutinut inatsisitigut pisussaaffigisanut naleqqiullugu aningaasartuuteqarnerussutit aningaasartuutikinnerussutilluunniit ilassutitut aningaasaliissutinut inatsimmut ilanngunneqartassapput aningaasartuuteqarnerussutaasoq aningaasartuutikinnerussutaasorluunniit inatsisilianik nutaanik allanngukkanilluunniit tunngaveqaraangat aningaasaliissutigineqartorlu Aningaasaqarnermut Ataatsimiititaliamit akuersissutigineqarsimagaangat.

Aningaasanut inatsisimmi isertitassat aningaasanut inatsisissatut siunnersuutip sularineqarnerata nalaani missingerneqartut aningaasanut inatsimmi aningaasartuutissanut killigitassanik tulleriinilersuinnermut aalajangiisoqataalluinnartarput.

Taamaalilluni Namminersorlutik Oqartussat aningaasartuutaannik ukiumoortumik ataatsimut tulleriinilersuinerup malitsigisarpaa ukiup aningaasanut inatsisip atuuffiata ingerlanerani isertitatut aningaasaliissutit nalinginnaasumik allannguuteqassanngitsut. Allannguuteqartoqarsimassappat taakku aningaasartuutit inatsisitigut pisussaaffigisat assigalugit Nunatta Karsiata naatsorsuutaanut ilanngunneqartartussaapput.

Tamanna ima paasineqassaaq:

- Naalakkersuisut isertitatut aningaasaliissutit aningaasanut inatsimmi isertitassatut missingersuusiukkanut naleqqiullutik allanngorarneri malinnaaffigisassagaat
- Naalakkersuisut aningaasaliissutit inatsisitigut pisussaaffigisat aningaasanut inatsimmi tunngavissaatinneqartunut naleqqiullutik allanngorarneri malinnaaffigisassagaat
- taakku allannguuteqartinneqarnissaat ukiup aningaasanut inatsisip atuuffiata nalaani qinnuteqaatigineqassanngitsaq, kisiannili Naalakkersuisut taamaattoqarnera soorunami eqqumaffigisassagaat aammalu tamanna qissimigaarlugu ataatsimoortumik aningaasatigut aqutsinertik aqqissuuttassagaat
- taamaallaat aningaasaliissutit taakku inatsisitigut allannguutinik aalajangersimasunik tunngaveqaraangata aningaasaliissutit taakku ilassutitut aningaasaliissutinut inatsimmut ilanngussat aqutigalugit aalajangersakkatigut allanngortinneqarnissaat qinnuteqaatigineqartartussaavoq.

4.5 Aningaasaleeriaatsit allannguuteqartinneqarnerminni Aningaasaqarnermut Ataatsimiititaliamit akuersissutigineqartut

Immikkoortup 4.4-p malitsigisaanik Aningaasaqarnermut Ataatsimiititaliap aningaasaleeriaatsit uku allanngortinneqarnissaat nalinginnaasumik suliarisarpaa:

- *Ingerlatsinermut aningaasaliissutit*
- *tapiissutitut aningaasaliissutit, aamma*
- *sanaartornermut aningaasaliissutit.*

4.6 Maleruagassanik erseqqinnerusunik aalajangersaanissamut tunngavissat

Aningaasaqarnermut Naalakkersuisoq maleruagassanik erseqqinnerusunik Missingersuusiornermut Malittarisassani aalajangersaasassasoq missingersuusiornermut inatsimmi § 20-imi 33-imi ilaati-gut allassimavoq.

Missingersuusiornermut Malittarisassaq atuuttoq taamani Aningaasaqarnermut Nunanullu Allanut Naalakkersuisuusumit 17. juni 2008-mi nassiunneqarpoq. Missingersuusiornermut Malittarisassaq kaajallaasitatut atuuppoq, taamaalillunilu ingerlatsivimmit saneqqunneqarsinnaanani. Aningaasaliissuteqarnissamik suliasamik suliarinninnermut atatillugu malittarisassani aalajangersakkanik saneqqutsinissaq pillugu aalajangersimasumik tunngavilersorluakkamillu Aningaasanut Naalakkersuisoq immikkut akuersissutiginnissimappat, tamanna aningaasaliissuteqarnissamik Aningaasaqarnermut Ataatsimiititaliamut qinnuteqaammi immikkut allaqqassaaq. Missingersuusiornermut malittarisassanik saneqqutsineq immikkullu akuersissuteqarneq pillugu isumaliutissiisummi matumani immikkoortoq 10.3.5, Qasigiannuani Efterskoli pillugu Aningaasaqarnermut Ataatsimiititaliap suliaanut 08-370-mut tunngasut innersuussutigineqarpoq.

4.7 Aningaasaliissutinik allannguinissamik qinnuteqaateqarnissamut piunasaqaatit

Missingersuusiornermut inatsimmi § 28, imm. 2-mi aalajangersarneqarpoq nutaanik aningaasaliissuteqartoqarnissaanik aningaasaliissutinilluunniit allanngortitsisoqarnissaanik qinnuteqaatit taamaallaat tassaassasut

- *pingaarutillit, aamma*
- aningaasanut inatsisissap suliarinerani *sillimaffigereerneqarsinnaasimannigitsunut* tunngasut.

Aalajangersagaq ima paasineqassaaq aningaasaliissuteqartoqarnissaanik tassanngaannartumik pisariaqartitsisoqalersimassasoq, tamannalu peqatigitillugu arlaatigut pingaaruteqartuussasoq. Aningaasaliissuteqartoqarnissaanik pisariaqartitsinerit aningaasanut inatsisissap suliarineqarnerani puiguisimanernik taamaaqataanilluunniit tunngaveqartut imaluunniit nutaanik aningaasaliissuteqartoqarnissaanik kissaateqarnerit ukiup tulliani aningaasanut inatsisissamut utaqqinneqarsinnaasut ukiup aningaasanut inatsisip atuuffiata ingerlanerani Aningaasaqarnermut Ataatsimiititaliamut qinnuteqarnissamut tunngaviginiarneqarsinnaanngisaannarput.

§ 28, imm. 3-mi aalajangersarneqarpoq nutaanik aningaasaliissuteqartoqarnissaanik aningaasaliissutinilluunniit allanngortitsisoqarnissaanik qinnuteqaatit taamaallaat aningaasaqarnikkut iliuusisanut ukiup aningaasanut inatsisip atuuffiata ingerlanerani aningaasartuuteqarnikkut sunnuteqartusanut tunngasuussasut. Taamaalilluni Inatsisartut Aningaasaqarnermut Ataatsimiititaliaata ukiup aningaasanut inatsisip atuuffiata ingerlanerani kinguneqaataasussat kisiisa isummerfigisinnaavai, ukiunilu tullerni kinguneqaataajunnartut aningaasanut inatsisissami tullermi ilanngunneqartussaapput.

Kiisalu § 28, imm. 4-mi aalajangersarneqarpoq nutaanik aningaasaliissuteqartoqarnissaanik aningaasaliissutinilluunniit allanngortitsisoqarnissaanik qinnuteqaatit paasissutissanik attuumasuteqartunik tamanik imaqartassasut, taakkunungalu ilaassallutik qinnuteqaatip aningaasaqarnikkut toqqaannartumik toqqaannanngitsumilluunniit kingunerisassai pillugit paasissutissat tamakkiisut.

Ulluinnarni periususartut naapertorlugit Aningaasaqarnermut Naalakkersuisoq Naalakkersuisut sinnerlugit aningaasaliissutit allanngortinneqarnissaanik qinnuteqaammik Aningaasaqarnermut Ataatsimiititaliamut nassiussisarpoq. Pappialat atortussat nassiunneqartut kontonut pingaarnernut, aningaasaliissutinik allanngortitsiffiginarlugit qinnuteqaatigineqartunut, missingersuutitut ilanngussanik imaqartussaapput.

Pisuni arlalinni missingersuutitut ilanngussat nassiunneqartut naatsuarakasiusarsimapput suliarlu pillugu illersorneqarsinnaasumik naliliinissamut periarfissaqartitsinatik. Aningaasaqarnermut Ataatsimiititaliap pappialat Naalakkersuisut namminneq najoqqutaasa *Naalakkersuisut isummernissaannut tunngavissiat* nuutinneri tigugajuttarmagit missingersuutitut ilanngussap ilusiligaanera ataatsimiititaliap suliamik suliarinninneranut aalajangiisuusumik pingaaruteqarneq ajorpoq.

Missingersuutinulli ilanngussat allagaatini kisiartaallutik aningaasaliissutinik allannguinnermut tunuliaqutaasumut nassuiaatitut ilassutitut aningaasaliissutinut inatsimmi ilanngunneqartarmata Aningaasaqarnermut Ataatsimiititaliap missingersuutitut ilanngussat kisimiillutik atuarneqarsinnaanngorlutik ilusilerneqartarnissaat annertuumik pingaartippaa. Missingersuutitut ilanngussat Inatsisartunut ilaasortanit kikkunnillu tamanit Naalakkersuisut isummernissaannut tunngavissianik immikkuualuttunilluunniit allanik tapertaqartinneqaratik atuarneqarsinnaasariaqarput.

Paasissutissat makku missingersuutitut ilanngussami ilaatinneqartussaapput::

- Aningaasaliissutit suuneri
- aningaasaliissutit allannguutissaattut qinnuteqaatigineqartoq kr.-inngorlugi (1.000 kr.-ikkaartunut akunnaallillugu),
- allannguutissatut qinnuteqaatigineqartup kingorna ukiup aningaasanut inatsisip atuuffiata ingerlanerani aningaasaliissutit amerlassuseriligassaat pillugit paasissutissiissutit,

- allannguutissatut qinnuteqaatigineqartup nassuiarnera tunngavilersuutitaalu,
- sulisoqarnermut tunngasut allannguuteqarnissaat naatsorsuutigineqarpat tamanna paasissutissiissutigineqassaaq,
- ukiunut missingersuusiorfinnut kinguneqassappat tamanna paasissutissiis-sutigineqassaaq,
- ingerlatsinermit sanaartukkanullu aningaasatigut toqqaannartumik aamma/imaluunniit toqqaannangitsumik kinguneqassappat tamanna paasissutissiissutigineqassaaq
- suliassami kisitsisit allannguuteqarsimappata paasissutissiissutigineqassaaq.

Taamaalilluni *allannguutissatut qinnuteqaatigineqartup nassuiarnerata tunngavilersuutitaatalu* suliap nalilersuiffiginissaanut naammattumik sukumiissuseqarnissaat pingaaruteqarpoq. Erseqqis-sarneqassaaq *allannguutip* aningaasanut inatsimmi tunngavissaatitaasunut naleqqiullugu qanoq it-tuunera pingaarnerpaatinneqassasoq.

4.8 Ilassutitut aningaasaliissutininut inatsisip imarisai

Ilassutitut aningaasaliissutininut inatsisip imarisarparaa inatsisip ileqqussat naapertorlugit oqaasertaa, ukununga tunngasunik nalinginnaasumik marlunnik paragrafeqartartoq:

- *aningaasaliissutit* allannguutaat, aamma
- *aningaasanut inatsimmi oqaasertaliussat* allannguutaat.

Ilassutitut aningaasaliissutininut inatsimmiittarpoq *Aningaasaliissutininut takussutissiaq*, ilanngussaq 1, kontonut pingaarnernut allannguuteqartunut tunngatillugu aningaasanut inatsimmi aningaasaliis-sutinik, ilassutitut aningaasaliissutinik aamma aningaasaliissutinik tamarmiusunik ilaatigut takussu-tissiisoq.

Taakku saniatigut ilassutitut aningaasaliissutininut inatsisip imarai *inatsisip oqaasertaanut nassuiaa-tit*. Nassuiaatit imaraat

- *missingersuutininut ilanngussat*, ilassutitut aningaasaliissutininut ataasiakkaanut tunngatil-lugu missingersuusiornermi tunngavilersuutinik imallit, kiisalu
- *oqaasertaliussanut nassuiaatit*.

Taakku saniatigut ilassutitut aningaasaliissutit aningaasaleeriaatsinut agguataarnerinut takussutis-siaq Naalakkersuisut 2008-imi ilassutitut aningaasaliissutininut inatsisissatut siunnersuutaanni ilan-ngunneqarsimavoq.

5. Naalakkersuisut 2008-imi Aningaasaqarnermut Ataatsimiititaliamut aningaasaliissu-teqarnissamik qinnuteqaataat

Nutaatut aningaasaliissuteqarnissamik aningaasaliissutinilluunniit allanngortitsinissamik, oqaaserta-liussassatut siunnersuutitut kiisalu immikkut ittumik atugassiissuteqarnissamik Naalakkersuisut qinnuteqaatitut saqqummiussa 93-it Aningaasaqarnermut Ataatsimiititaliamit 2008-imi suliarineqarput. 2008-imi ukiunilu siuliini suliat amerlassusiat takussutissiami ataaniittumi takuneqarsin-naavoq.

Ukioq	Suliat amer- lassusiat
2001	66
2002	48
2003	57
2004	82
2005	69
2006	56
2007	84
2008	93

Suliassat aalajangiiffigisassat 93-it pineqartut Aningaasaqarnermut Naalakkersuisunit tiguneqarnermik kinguninngua Aningaasaqarnermut Ataatsimiititaliamit nalinginnaasumik suliarineqartarsimapput. Pisulli ilaanni suliassaq Naalakkersuisunit suliarineqarsimasoq sapaatit akunneri arlallit qaangiutereeraangata aatsaat Aningaasaqarnermut Ataatsimiititaliamut nassiunneqartartoq Aningaasaqarnermut Ataatsimiititaliamit maluginiarneqarpoq.

Suliassanit 93-init taaneqartunit 28-it (30 %-ingajaat nalingi) piffissami 1. septemberimit 2008-imi decemberip naanissaata tungaanut Naalakkersuisunit suliarineqarsimasut Aningaasaqarnermut Ataatsimiititaliap paasissutissiissutigisinnaavaa.

2004-mi september - decemberimi suliassanit 82-init 44-t suliarineqarsimapput, tassa 54 %-it nalingi.

2005-mi september - decemberimi suliassanit 69-init 35-t suliarineqarsimapput, tassa 51 %-it nalingi.

2006-mi september - decemberimi suliassanit 56-init 30-it suliarineqarsimapput, tassa 54 %-it nalingi.

2007-mi september - decemberimi suliassanit 84-init 31-it suliarineqarsimapput, tassa 37 %-it nalingi.

Ukiup taamaalereernerani qinnuteqartoqartillugu aningaasat atorneqareerneranni aningaasaliissuteqarnissaq pineqartoq aarleqqutigineqarsinnaavoq. Taamaattumik ajornartorsiut taanna Naalakkersuisunit suli eqqumaffigineqartariaqarpoq, missingersuusiormummi inatsit unioqutillugu aningaasat atorneqareersut aningaasaliissutinik akuersissuteqarnissaq Aningaasaqarnermut Ataatsimiititaliamit kissaatigineqanngimmat.

Ataatsimiititaliap 2008-mi sulianit 93-init suliarisaanit 38-it Naalakkersuisut siulittaasuata aalajangiinera tunngavigalugu Aningaasaqarnermut Ataatsimiititaliamut nassiunneqarsimapput. Tamanna eqqarsarnarpoq Naalakkersuisunillu isumaliutigineqartariaqarpoq Naalakkersuisut ataatsimoorlutik ingerlatsinissaannik tunngaveqarnissamik kissaateqarnermut siulittaasumit aalajangerneqartartut taama amerlatiginerat naapertuunnersoq.

Aalajangiiffigisassatut siuliassat pineqartut 93-it Aningaasaqarnermut Ataatsimiititaliamit ima amerlatigisoriarluni suliarineqarput:

Suliassat 87-it ataasiarluni suliarineqarput

Suliassat arfinillit marloriarluni suliarineqarput.

Taamaalillutik Aningaasaqarnermut Ataatsimiititaliap aalajangiineratigut Naalakkersuisulluunniit suliassamik tunuartitsinerisigut suliat tamarmik naammassillugit suliarineqarput. Suliarli 08-395 suliarisinnaanagu ataatsimiititaliaq isumaqarsimavoq, tassa inassuteqaatit aningaasat ukiuannut 2008-mut tunngangimmata.

Suliani ukunani Naalakkersuisut qinnuteqaataat Aningaasaqarnermut Ataatsimiititaliamit itigartineqarput: Suliaq nr. 08-313, 08-325, 08-377 (ilaannakuusumik itigartitsineq), 08-389, 08-394, 08-396 aamma 08-397. Suliat naammassineqartut sinnerini tamani Naalakkersuisut inassuteqaataat Aningaasaqarnermut Ataatsimiititaliamit akuerineqarsimapput.

Suliani arlalinni Naalakkersuisut ilassutitut aningaasaliissuteqarnissamik qinnuteqaataannik ataatsimiititaliap akuersinera suliat suussusiinik pissuteqartumik missingersuutitut ilanngussatigut¹ takussutissaqartinneqartannikkaluartuq, sulianut 2008-mi Inatsisartut Aningaasaqarnermut Ataatsimiititaliaannit akuerineqartunut missingersuutitut ilanngussat pisariaqartut 2008-mut ilassutitut aningaasaliissutitut inatsisissatut siunnersuummut ilanngunneqarsimasut Aningaasaqarnermut Ataatsimiititaliamit oqaatigineqassaaq.

Kiisalu missingersuutitut ilanngussat arlallit kukkuneqarlutillu amigaateqartut ataatsimiititaliap paasimmagu Aningaasaqarnermut Ataatsimiititaliap oqaatigissavaa. Tamanna isumaliutissiisummi kingusinnerusukkut sammineqassaaq.

6. 2008-imi aningaasanut inatsit aamma 2008-mi ilassutitut aningaasaliissutitut inatsisissatut siunnersuut – kisitsisit pingaarnerit aningaasaleeriaatsinullu agguataarinerit

6.1 Kisitsisit pingaarnerit aningaasanngorlugit

2008-imi aningaasanut inatsimmi aamma 2008-imi ilassutitut aningaasaliissutitut inatsisissatut siunnersuummi kisitsisit pingaarnerit aningaasanngorlugit takussutissiarineqarnerat 2008-mi ilassutitut aningaasaliissutitut inatsisissatut Naalakkersuisut siunnersuutaata danskisuuani quppernemi 64 – 66-imi kalaallisuanilu quppernemi 71 – 73-imi takuneqarsinnaapput, taakkulu innersuussutitigineqarput.

Oqaatigineqassarli aningaasaliissutinik allannguutit ilanngaattissat ilanngaatigereerlugit 104,421² mio. kr.-inik aningaasartuuteqarnermik nalillit Aningaasaqarnermut Ataatsimiititaliamit 2008-mi akuerineqarmata. Tamatuma kingorna 2008-mi IST-kkut angusat 389,6 mio. kr.-inik **amigartoorfiussatut** missingerneqarput. Matumani eqqaamasariaqarpoq *angusassatut missingersuutit* inaarutaasumillu *naatsorsuutitigut angusat* assigiinnngimmata. 2008-mi inaarutaasumik naatsorsuutitigut angusat **318 mio. kr.-inik amigartooruteqarfiusut** 2008-mi Nunatta Karsiata naatsorsuutaani takuneqarsinnaapput. 1987-ip kingorna Nunatta Karsia aatsaat taama amigartooruteqartigaaq.

6.2 Ilassutitut aningaasaliissutit (inatsisissatut siunnersuummi § 1) – allannguutit oqartussaasunit assigiinnngitsunit pingasunit akuersissutitigineqartut

¹ Soorlu taamaappoq suliani isumaqatigiissuteqarnissamut pigisamilluunniit soorlu illuutimik tunisinissamut Naalakkersuisunut ilaasortaqaq ataatsimiititaliamit piginnaatinneqarsimatillugu.

² Tassa 81,493 mio. kr.-iunatik, taamatummi inatsisissatut siunnersuummi aningaasaliissutitut takussutissap (ilanngus-saq 1) quppernerani kingullermi kukkusumik allaqqavoq. Isumaliutissiisummi immikkoortoq 10.2.3-p ataani konto pingaarneq 32.10.06, Peqqissaanermik Ilinniarfimmuut tunngasoq, pillugu allaqqasut innersuussutitigineqarput.

Inatsisissatut siunnersuummi ilaapput ilassutitut aningaasaliissutit ukuninnga akuersissutigineqartut

- Naalakkersuisunit, oqaasertaliussanik innersuussinikkut
- Inatsisartut Aningaasaqarnermut Ataatsimiititaliaannit
- Inatsisartunut/Inatsisartut Suleriaaseq pillugu Ataatsimiititaliaannit

Aningaasaliissutit allannguutaat aalajangersimasut *Aningaasaliissutinut takussutissiami, ilanngussaq 1-imi*, takuneqarsinnaapput. Allannguutit ataasiakkaat *missingersuutinut ilanngussartaqarput*, taakkunanilu allannguutit erseqqinnerusumik nassuiarneqarput. *Ilanngussaq 1-imi* taamatullu *missingersuutinut ilanngussani* takuneqarsinnaassaaq Aningaasaqarnermut Ataatsimiititaliaq Naalakkersuisulluunniit aningaasaliissutinik allannguisoqarnissaanik qanga akuersisimanersut suliarlu sorleq pineqarnersoq.

6.2.1 Naalakkersuisut oqaasertaliussamut innersuussillutik akuersissutigisaat

Oqaasertaliussat tunngavigalugit aningaasaliissutinik nuussinerit amerlasuut Naalakkersuisunit akuersissutigineqarput. Nuussinerit takku ilanngaattissat ilanngaatigereerlugit missingersuutinut sunniuteqanngillat³. Ingerlatsinerimut tunngasuni nuussinerit amerlanerpaartaat suliaasaqarfiit allanngornerinik pissuteqarput.

Naalakkersuisut aalajangiineranni tunngavissaatitaasut eqquutsinneqarsimanersut Aningaasaqarnermut Ataatsimiititaliaq erseqqinnerusumik naliliiffigisimavaa. Isumaliutissiissutit immikkoortuani 9.3-mi allassimasut innersuussutigineqarput.

6.2.2 Inatsisartut Aningaasaqarnermut Ataatsimiititaliaannit akuersissutigineqartut

Ingerlatsinerimut aningaasaliissutit

Ingerlatsinerimut aningaasaliissutinik allannguinerit ilanngaattissat ilanngaatigereerlugit 34,0 mio. kr.-inik nalillit Aningaasaqarnermut Ataatsimiititaliamit akuersissutigineqarput.⁴

Tapiissutitut aningaasaliissutit

Tapiissutitut aningaasaliissutinik allannguinerit ilanngaattissat ilanngaatigereerlugit 58,87 mio. kr.-inik nalillit Aningaasaqarnermut Ataatsimiititaliamit akuersissutigineqarput.

Aningaasaliissutit inatsisitigut pisussaaffigisat

Appasinnerpaamik akunnattumillu isertitalit meeqqanut tapisiaannik qaffaaneq tunngavigalugu aningaasaliissutinik inatsisitigut pisussaaffigisanik allannguinerit ilanngaattissat ilanngaatigereerlugit 4,6 mio. kr.-inik nalillit Aningaasaqarnermut Ataatsimiititaliamit akuersissutigineqarput. Tamatumani saniatigut aningaasaliissutinik inatsisitigut pisussaaffigisanik allannguinissamik akuersissuteqartoqanngilaq, tamannalu missingersuusiormut inatsimmi § 27-imut naapertuuppoq.

³ Taamaallunilu Naalakkersuisut nuussineratigut ilanngaattissat ilanngaatigereerlugit missingersuutit 22,928 mio. kr.-inik nalilinnik ajorseriansimanerannik inatsisissatut siunnersuummi aningaasaliissutinut takussutissiami (ilanngussaq 1) allaqqammat kukkuneruvoq. Isumaliutissiissummi immikkoortoq 10.2.3-p ataani konto pingaarneq 32.10.06, Peqqissaanermik Ilinniarfik pillugu allassimasut innersuussutigineqarput.

⁴ Taamaalluni ingerlatsinerimut aningaasartuutinik ilanngaattissat ilanngaatigereerlugit 11,1 mio. kr.-inik nalilinnik allannguinissaq Aningaasaqarnermut Ataatsimiititaliamit akuerineqarsimasoq aningaasaliissutit allannguutaannut takussutissiami allaqqasoq kukkuneruvoq. Isumaliutissiissummi immikkoortoq 10.2.3-p ataani konto pingaarneq 32.10.06, Peqqissaanermik Ilinniarfik pillugu allassimasut innersuussutigineqarput.

Isertitassatut aningaasaliissutit

Isertitassatut aningaasaliissutinik allannguinnissamik Aningaasaqarnermut Ataatsimiititaliaq 2008-mi akuersissutiginnissimangilaq, tamannalu aningaasanut inatsimmi aningaasartuutissatut atugassiisutigineqartut Inatsisartut ataatsimoortumik pingaarnersiunerannut ersiutaanissaannik tunngavimmut naapertuuppoq, tak. missingersuusiornermut inatsimmi § 5.

Sanaartugassanut aningaasaliissutit

Ilanngaatissat ilanngaatigereerlugit sanaartugassatut aningaasaliissutit 6,913 mio. kr.-inik amerlineqarnissaat Aningaasaqarnermut Ataatsimiititaliap akuersissutigisimavaa, tamatumalu kingorna 2008-imi sanaartugassanut aningaasaliissutit katillutik 961,7 mio. kr.-iusimapput.

6.2.3 Inatsisartut Suleriaaseq pillugu Ataatsimiititaliaannit akuersissutigineqartut

Aningaasaliissutinik allannguinerit ilanngaatissat ilanngaatigereerlugit katillugit -14,966 mio. kr.-inik nalillit Suleriaaseq pillugu Ataatsimiititaliamit akuersissutigineqarput. Tamanna Inatsisartut ataatsimiittarfiannik allilerinissap taamaatinneqarnissaanik siulittaasoqarfiup aalajangiineranik tamatumalu kingorna sanaartornermut aningaasaliussanik Nunatta Karsianut utertitsinermik pissuteqarpoq.

7. Oqaasertaliussanik allannguinerit (inatsisissatut siunnersuummi § 2)

Oqaasertaliussat arlalissuit inatsisissatut siunnersuummi ilanngunneqarsimapput. 2008-imi aningaasanut inatsimmi oqaasertaliussat taakku taamaaqqataat oqaasertaliussanit akuersissutigineqartunit taarserneqarput/ilassuserneqarput. Ukiunut siuliinut sanilliullugu oqaasertaliussat taama amerlanerutiginerannut minnerunngitsumik pissutaavoq taamani Naalakkersuisuusut aaqqissuusaanikkut pisariillisaanertut taasaat, tamatumalu kingunerisaanik qitiusumik allaffeqarfissuarmi suliassaqarfinni 2008-mi aasakkut allannortiterineq.

Oqaasertaliussanut nassuiaatit tamakkiisuunnginnerat Aningaasaqarnermut Ataatsimiititaliap ukiut siuliini tikkuavigereepaa. Tamanna tunngavigalugu oqaasertaliussanut nassuiaatit ataatsimut isigalugu paasisutissiinerulersimanerat ataatsimiititaliamit nuannaarutigineqarmat oqaatigineqassaaq.

Oqaasertaliussalli allannortinneqarnissaannik qinnuteqarnissaq *sooq* pisariaqarnersoq pillugu paasisutissat ersarissut nassuiaatini saqqummiunneqartariaqarnerat erseqqissassallugu ataatsimiititaliap ukiut siuliinisulli pisariaqarsoraa. Pisut amerlanerpaartaanni paasisutissat taakku amigaataapput.

Aammattaaq oqaatigineqassaaq aningaasaliissutinik allannortitsinissaq qanga akuersissutigineqarsimanersoq oqaasertaliussanut *nassuiaatini* ilanngutissallugu naammammat – oqaasertaliussami aamma ilanngunnissaa pisariaqanngilaq, ilanngunneqarsimassagaluarpalli ajoqutaanaviannngilaq.

8. Konto pingaarneq 20.11.50 – Ingerlatsinermut sillimmatit

2008-imut aningaasanut inatsit ingerlatsinermut sillimmatinik 44,6 mio. kr.-inik ilaqartillugu akuersissutigineqarpoq, taakkunannga 20 mio. kr.-it Peqqinnissaqarfimmut immikkut atugassiisutigineqareersimallutik. Ingerlatsinermut sillimmatit tigusiffigineqarnissaat/ilaneqarnissaat 2008-imi aqqanileriarluni akuersissutigineqarsimavoq, tamatumalu kingorna 31. december 2008-imi 0,8 mio. kr.-it

sinnerussimallutik. Taamaalillutillu ingerlatsinermut sillimmatit ilanngaaseereerluni 43,8 mio. kr.-inik 2008-imi tigusiffigineqarsimapput.

Assersuutitut taaneqarsinnaavoq 2007-imut aningaasanut inatsit 14,7 mio. kr.-inik ingerlatsinermut sillimmatitaqartillugu akuersissutigineqarmat. Ingerlatsinermut sillimmatit tigusiffigineqarnissaat/ilaneqarnissaat 2007-imi qulingiluariarluni akuersissutigineqarsimavoq, tamatumalu kingorna kontomi 31. december 2007-imi 1,2 mio. kr.-it sinnerussimallutik.

Tamatuma saniatigut suliaaqaarfimmi 20-imi sillimatinut kontonit allanit 20,3 mio. kr.-it atugasiiissutigineqarsimapput.

Aningaasat qanoq amerlatigisut pineqartut eqqarsaatigigaanni sillimatinut kontonit aningaasalersugaasunik suliniutinik nutaanik piviusunngortitsineq aallartitsinerlu missingersuusiornermut inatsimmi § 5, ukiumi aningaasanut inatsiseqarfiusumi Inatsisartut aningaasaqarnermik ataatsimoortumik tulleriarinerannik aningaasanut inatsisip ersersitsisuunissaanik aalajangersaasoq, naapertorlugu pissasoq Naalakkersuisunut taamatullu Inatsisartunut ilaasortanut eqqaasitsissutigeqqissallugu pisariaqarsorinarpoq.

Tamatuma saniatigut Namminersorlutik Oqartussat aqutsivianni piviusorsioortumik missingersuusiortarnissamut missingersuutinillu malitseqartitsisarnissamut kajumilersitsinissaq pisariaqartoq qulakkeerneqarsinnaaqullugu sillimatitut aningaasaliussat aallaavittut isigalugu sapinngisamik killeqartinneqarlutillu siunertamut aalajangersimasumut immikkoortinneqartariaqarnerat siornatulli Aningaasaqarnermut Ataatsimiititaliamit oqaatigineqassaaq.

9. Naalakkersuisut nuussinernut Aningaasaqarnermut Ataatsimiititaliap oqaaseqaatai

9.1 Ataatsimut isigalugu

Aningaasanut inatsimmi oqaasertaliussat aammalu oqaasertaliussat, Aningaasaqarnermut Ataatsimiititaliamit kingusinnerusukkut akuersissutigineqartut 2008-imilu ilassutitut aningaasaliissutinut inatsimmi ilanngunneqartut naapertorlugit kontot pingaarnert assigiinngitsut kiisalu sanaartornerup iluani suliaat akornanni nuussinissanut Naalakkersuisut piginnaatinneqarput.

Nuussinissat akuersissutigineqarsimatillugit aningaasaliissutinik allanngortitsinerit pinerit tamaasa aningaasaliissutinut takussutissiap, ilanngussaq 1-ip, immikkoortortaani (kolonne) ilanngunneqartarput. Missingersuutinut ilanngussani nuussinernut tunngavilersuutit aammalu Naalakkersuisut ulloq akuersissutiginniffiat allassimassapput. Kiisalu oqaasertaliussat, nuussinissamut tunngaviliisusut pillugit paasissutissat nalunaarneqassapput.

Missingersuutinut ilanngussat taakku Aningaasaqarnermut Ataatsimiititaliap misissorpai, tamannalu tunngavigalugu missingersuutinut ilanngussat paasissutissiilluartuunissaasa qulakkeerneqarnissaanik pingaartitsinerminnik ingerlatsiinnarnissaanik Naalakkersuisut kaammattorlugit. Missingersuutinut ilanngussat Naalakkersuisuinnarnit akuerineqartussatut naatsorsutigineqartut eqqarsaatigalugit immikkut eqqumaffiginninnissaq pisariaqarsorinarpoq. Ataatsimut isigalugu taakku missingersuutinut ilanngussanit Aningaasaqarnermut Ataatsimiititaliamit suliarineqareersunut sanilliullutik paasissutissartakinnerupput.

9.2 Aalajangersimasunut oqaaseqaatit

9.2.1 Sulisorisat pillugit paasissutissat

Missingersuutininut ilanngussani arlalinni allannguutissatut akuersissutigineqartut *Sulisorisassatut naatsorsuutigisat*-nut kinguneqaatissaat pillugit paasissutissat aamma ukioq manna amigaataaqqipput. Pisut ilaanni paasissutissat taakku amigaataalluinnarput, ilaannilu *sulisorisatigut allannguutit pinnagit* atorfiit allannguutaat aalajangersimasut nalinginnaasumik paasissutissiissutigineqartarsimallutik.

Missingersuusiornermut malittarisassami 2008-meersumi immikkoortoq 5.2 Aningaasaqarnermut Ataatsimiititaliamit aamma innersuussutigineqassaaq, tassani sulisorisassatut naatsorsuutigisat taakkulu naatsorsorneqartarnerat pillugit paasissutissiissuteqarnissamut Naalakkersuisut najoqqutassanik pitsaalluinnartunik aalajangersaasimapput.

Sulisorisassatut naatsorsuutigisat pillugit paasissutissat eqqortuugaluarpata 2008-imi aningaasanut inatsimmi takussutissiat *sulisorisassatut naatsorsuutigisat* pillugit paasissutissanik imallit nutarterneqarsinnaassagalarput. Taamaaliornikkut 2008-imi naatsorsuutininik tunniussinermut atatillugu *Sulisorisassatut naatsorsuutigisat sulisorisatut atorneqarpiartununut* sanilliunneqarnissaat periarfissaqalissagalarpoq.

Suliffiit aalajangersimasumik amerlassusilikkat pineqannginnerat erseqqissarneqarsinnaaqqullugu aningaasaliissutinut inatsisissani aggersuni sulisorisassatut naatsorsuutigisat pillugit takussutissiani ukioq naallugu sulisorisat atorneqartalernissaat ataatsimiititaliap ukioq manna aammaarluni **siunnersuutigissavaa**. Taamaaliornikkut kukkuneq taanna ajoraluartumik nalinginnaaqisoq killilersimaarneqarsinnaassagalarpoq.

9.2.2 Naalakkersuisut kingumoortumik atuutilersumik nuussinissanik akuersissutiginninnerat

Malittarisassatut pingaarnertut isigalugu kingumut atuutilersussanngorlugit nuussinissat akuersissutigineqartannginnissaat, taamaattoqartillugulu aningaasat atorneqareerneranni akuersissutiginnittoqartannginnissaa qulakkeerneqartassasoq Aningaasaqarnermut Ataatsimiititaliap Naalakkersuisunut ukiut arlallit ingerlanneranni kaammattuutigisarpa. Taamaalillunilu missingersuutininik qaangiinissaq taama ersaritsigitillugu ukiumi aningaasanut inatsisip atuuffiata naalernerani nuussinerit ingerlanneqartariaqanngillat. Tassunga taarsiullugu missingersuutininik qaangiinnermut pissutaasoq nunatta karsiata naatsorsuutaanut atatillugu naatsorsuutininut nassuiaatini ersarissarneqartariaqarpoq.

Taamaalillutik assersuutigalugu kontomit pingaarnermut 30.01.01-imit, Ilaqutariinnermut Peqqissutimullu Naalakkersuisoqarfimmut tunngasumit, konto pingaarnermut 30.30.01-imut, Ilaqutariinnermut Pitsaaliuinnermullu Aqutsisoqarfimmi allaffissornermut tunngasumut, 1,0 mio. kr.-it nuunneqarnissaat Naalakkersuisut ulloq 4. december 2008-mi akuersissutigaat. Taamaaliornermikkut 08-383-imi Aningaasaqarnermut Ataatsimiititaliap aalajangiinerata ilaa Naalakkersuisut allanngortippaat, tassani kontot pingaarnertut taakku marluk akornanni illuanortumik 1 mio. kr.-inik nuussinissaq ataatsimiititaliamit akuerineqarpoq. Suliassaqarfimmut 10-89-imut oqaasertaliussami piginnaatitsissut tunuliaqutaralugu Naalakkersuisut aalajangiippat. Aningaasaliissutinik nuussinerup ilaanik, Aningaasaqarnermut Ataatsimiititaliamit akuerineqarqammarsunik, piginnaatitsissut atorlugu Naalakkersuisut allannguigamik iliuusertik nammineerlutik Aningaasaqarnermut Ataatsimiititaliamut ilisimatitsissutigisimasariaqarpaat.

Tamatuma saniatigut ataatsimiititaliaq isumaqarpoq nuussineq taanna ataatsimiititaliap siusinnerusukkut kaammattuutigisaanut naapertuutinnigisoq, nuussinermummi kontomi pingaarnermi 30.30.01-imi, Ilaqutariinnermut Pitsaaliuinnermullu Aqutsisoqarfimmi allaffissornermut tunngasumi, atuivallaarnissamik naatsorsuutiginninnerup allaalluunniit immaqa atuivallaareernerup toqqorterneqarnissaa erseqilluinnartumik siunertarineqarmat.

Tamanna tunngavigalugu kaammattuut aallarniutigalugu taaneqartoq Aningaasaqarnermut Ataatsimiititaliamit uteqqinneqassaaq. Tamatuma saniatigut kontot pingaarnert erseqqilluinnartumik qaangiiffiusussat nunatta karsiata naatsorsuutaasa kusassarneqarnissaat siunertariinnarlugu aningaasaliissutinik ukiup naalernerani nuussiffigineqartannginnissaannik Naalakkersuisut ataatsimiititaliamit **kaammattorneqarput**. Missingersuusiornermut inatsit naapertorlugu aningaasaliissutinik qaangiinnissap (taamaalillunilu inatsimmik unioqqutitsinissap) pinngitsoortinniarnissaanut Naalakkersuisut pisussaaffeqarnerat, taamaalillutillu aningaasaliissutinik atuivallaarnissaaq pinngitsoorniarlugu oqaasertaliussani nuussinissamat piginnaatitsissutinik Naalakkersuisut atuinissaat ataatsimiititaliamit soorunami akuersarneqarpoq. Ukiulli naalernerani taama nuussinerit immikkoortortani aningaasaqarnermik aqutsinerup nunatta karsiata naatsorsuutaani eqqortumik takutinneqanngitsoorneranut peqataaqataasinnaapput, taamaaliornikkullu aningaasaqarneq piffissaagallartillugu iliuuseqarfigineqanngitsoorluni. Tamatuma saniatigut naatsorsuutinik taama kusassaanerup nassatarisarpaa nunatta karsiata aningaasaataanik ukiumut aggersumut aningaasanut inatsisissamat Inatsisartut missingersuusiornersa pingaarnersiullutillu tullerriaarinerisa pisariunerulernera. Taamaattumik pisuni taamaattuni aningaasaliissutinik nuussisinnaatitaanerminnik Naalakkersuisut atuinaveersaartariaqartut tassungalugu taarsiullugu nuussinissaaq pillugu qinnuteqaammik Aningaasaqarnermut Ataatsimiititaliamut saaqummiussisariaqartut Aningaasaqarnermut Ataatsimiititaliaq isumaqarpoq.

9.3 Naalakkersuisut aningaasaliissutinik nuussineranni inatsisitigut tunngavissat

Inatsisitigut tunngavissaatitat naapertorlugit Naalakkersuisut nuussineri pisimanersut Aningaasaqarnermut Ataatsimiititaliamit erseqqinnerusumik naliliiffigineqarsimavoq. Ataatsimut isigalugu pissutsinik tamatumunnga naapertuutinnigitsunik ataatsimiititaliaq nalaataqarsimanngilaq.

10. Aningaasaqarnermut Ataatsimiititaliap inatsisissatut siunnersuummut oqaatigiumasai allat

10.1 Nalinginnaasumik oqaaseqaatit

Aallaqqaasiutigalugu isumaliutissiisummi immikkoortoq 5 innersuussutigineqarpoq, tassani suliat amerlassusiat, qinnuteqaatinik Aningaasaqarnermut Ataatsimiititaliap suliarinninnerata inerneru naapertorlugit agguataakkamik nalunaarsorneqarsimallutik.

Tamatuma saniatigut ilanngussaaq A innersuussutigineqassaaq, tassani Aningaasaqarnermut Ataatsimiititaliap ukiumi qaangiuttumi aalajangigai tamakkerlutik suliap normukkaarlugit ilangunneqarsimapput. Aalajangiinerni arlalinni annertunerusumik paasissutisseeqqullugit missingersuutinulluunniit ilanngussamik nutaamik nassiusseqqullugit Naalakkersuisut ataatsimiititaliamit qinnuigineqarsimapput. Taakkutaaq pisariaqartillugu aalajangiinernut ataasiakkaanut kingullinnngorlugit ilanngunneqarput.

Nuussinissat Naalakkersuisut namminneq akuersissutigisaat immikkoortup siuliani Aningaasaqarnermut Ataatsimiititaliamit sammineqarput. Ajoraluartumik oqaatigineqassaaq kukkunerit naapertuutinnigitsullu arlallit missingersuutinut ilanngussani Naalakkersuisunit akuersissutigineqartuni

nassaassaasut missingersuutitut ilanngussani Aningaasaqarnermut Ataatsimiititaliamit akuersissutigineqartuni aamma nassaassaammata. Tassunga atatillugu oqaatigineqassaaq aningaasaliissutinik allannguinissat aalajangersimasut ataatsimiititaliamit akuersissutigineqarneraangata imaangimmat missingersuutitut ilanngussat ilassutitut aningaasaliissutinut inatsimmi ilanngunneqartussatut Aningaasaqarnermut Ataatsimiititaliamit akuerineqartut.

Taamaalillunilu ilaatigut ilusiligaanermikkut inissitsiterneqarnermikkullu assigiissarneqarnissaasa kiisalu aningaasaliissutinut tunngasut nassuiarneqarnerisa pitsaasuunissaasa qulakkeerneqarnissaat siunertaralugu missingersuutitut ilanngussat ilassutitut aningaasaliissutinut inatsimmi ilanngunneqannginneranni Naalakkersuisunit misissorneqartarnissaat Aningaasaqarnermut Ataatsimiititaliamit nalinginnaasumik naatsorsuutigineqarpoq. Inatsisissatut siunnersuutip Naalakkersuisuneersup pitsaasuunera sukumiisumik misissorneqarsimassasoq naatsorsuutigineqartariaqarpoq.

Suliami paasissutissat amigarpallaarnerat pissutigalugu Naalakkersuisut qinnuteqaataannik suliarinninni Aningaasaqarnermut Ataatsimiititaliap pisut ilaanni kinguartittarsimavaa. Naalakkersuisut isummernissaannut tunngavissianik assigisaannilluunniit atortoqarani atuarneqarsinnaaqqullugit missingersuutitut ilanngussat tamakkiisuunissaat Naalakkersuisunut eqqaasitsissutigissallugu ataatsimiititaliap pisariaqarsoraa.

Tassunga atatillugu missingersuusiornermut inatsimmi § 28, imm. 2-p ataqqineqarnissaa naatsorsuutigineqarpoq. Aalajangersakkakut aalajangersarneqarpoq nutaanik aningaasaliissuteqartoqarnissaanik aningaasaliissutinilluunniit allanngortitsisoqarnissaanik qinnuteqaatit taamaallaat aningaasaqarnikkut iliuusissanut pingaarutilinnut aammalu aningaasanut inatsisissap suliarinerani silimaffigereerneqarsinnaasimangitsunut tunngasuusassasut.

10.2 Inatsisissatut siunnersuummi kukkunerit amigaatillu aalajangersimasut

10.2.1 Ilangussaq 1 aamma nalinginnaasumik nassuiaatit

Quppernermi 27-imi § 1-imut nassuiaatit ataanni immikkoortoq oqaatsinik ukuninnga aallartittoq ”Bilag 1 er opbygget således, at...” danskisut tamakkiisumik paasinangilaq. Kukkuq taassuma asserpiaa 2005-imi, 2006-imi aammalu 2007-imi ilassutitut aningaasaliissutinut inatsimmut tunngatillugu ataatsimiititaliap uparuarpa, taamaattumillu kukkunerup taassuma ukiut sisamassaannik uteqqinneqarnera paasillugu assorsuaq pakatsinarpoq. Ajoraluartumik isumaqaqqajaanarsinnaavoq Naalakkersuisut inatsisissatut siunnersuutaasa ataatsimiititaliamit atuarneqartarnerattut sukumiitigisumik Naalakkersuisut Aningaasaqarnermut Ataatsimiititaliap isumaliutissiissutaanik atuarneq ajortut.

Tamanna tunngavigalugu 2009-mi ilassutitut aningaasaliissutinut inatsisissatut siunnersuummi kukkuq taanna uteqqeqqunagu Naalakkersuisut **kaammattussallugit** pisariaqartoq Aningaasaqarnermut Ataatsimiititaliaq isumaqarpoq. Pineqartoq taama pisariunngitsigisoq pillugu kaammattuteqartariaqarneq ataatsimiititaliamit naammaginangilluinnartutut isigineqarpoq, tunngavissalli pigineqartut tunngavigalugit allatut iliorsinnaasorinani.

Immikkoortoq 10.2.3-p ataani konto pingarneq 32.10.06, Peqqissaanermik Ilinniarfimmut tunngasoq, pillugu allaqqasut aamma innersuussutigineqarput.

10.2.2 Ilanngussaq 2, 2008-imut oqaasertaliussanut allannguutit

Suliassaqarfimmu 10-89-imut Naalackersuisut

Oqaasertaliussaq nr. 1-imit siullinngorlugu oqaasertaliussaq nr. 6-ip inissinneqarsimanera kukkuneruvoq.

Suliassaqarfimmu 30.10.32 Meeqqanut tapiissutit

Kontomut pingaarnermut tassunga oqaasertaliussamik ilassutitut aningaasaliissutitut inatsisissatut siunnersuummi ilanngussisoqarsimanngilaq.

Meeqqanut tapiissutit qaffanneqarnissaannut aningaasaliissuteqarnissamik Naalackersuisut qinnuteqaataat 08-339 Aningaasaqarnermut Ataatsimiititaliamit ulloq 20. juni 2008-mi akuerineqarpoq. Kontomut pingaarnermut matumunnga 4,6 mio. kr.-inik ilassutitut aningaasaliissuteqarnissaq tamamani ataatsimiititaliamit akuerineqarpoq. Kukkunikkulli kontomut pingaarnermut matumunnga oqaasertaliussami aningaasanut killiliussat *aamma* allanngortinneqarnissaat eqqumaffiginngitsorneqarsimavoq. Taamaalillunilu 1. juli 2008 aallarnerfigalugu meeqqanut tapiissutit qaffaanermut inatsisitigut tunngavissaq iluarsineqarsimanani. Ajornartorsiut 2008-muinnaq atuuppoq, aningaasannummi killiliussat nutaat 2009-mi aningaasanut inatsimmut ilanngunneqarmata.

Taamaattumillu kukkuneq taanna iluarsineqarsinnaaqullugu inatsisissatut siunnersuutip matuma pingajussaaneerineqarnissaanut **allannguutissatut siunnersuummik saqqummiusseqqullugit Naalackersuisut** Aningaasaqarnermut Ataatsimiititaliamit **qinnuigineqarput**. Inatsisartut aappasaaneerineranni tamanna uppersaqqullugu Naalackersuisut qinnuigineqarput.

Konto pingaarnermut 40.10.12-imut Efterskolit

08-331-ip aalajangiiffigineratigut oqaasertaliussap taassuma Aningaasaqarnermut Ataatsimiititaliamit akuersissutigineqarsimaneranik oqaasertaliussami oqaasertaliussamullu nassuiaatini allaqqasoq kukkuneruvoq. Tamanna eqqunngilaq. Ataatsimiititaliap akuersinera 08-336-ip aalajangiiffigineratigut pivoq. Kukkuneq taanna inatsisissatut siunnersuutip pitsaassusiata nalinginnaasumik misissoreratigut paasineqarsimassagaluarpoq.

Konto pingaarnermut 62.05.12-imut Aluminiumimik pilersaarut

Oqaasertaliussassatut siunnersuut naleqqussarneqassasoq aalajangiinermi 08-331-mi Aningaasaqarnermut Ataatsimiititaliap qinnutigaa, taamaalilluni ilassutigineqassalluni piginnaatitsissummik atuisoqartillugu Aningaasaqarnermut Ataatsimiititaliamut ilisimatitsissuteqartarnissaq. Taama ilassuteqarnissamut ataatsimiititaliap pisortatigoortumik akuersinera aalajangiinikkut taaneqartukut erserineqartutut isigineqarpoq. Ataatsimiititaliamit kaammattuutigineqartoq qinnutigineqartorluunniit malinneqarsinnaanngippat Aningaasaqarnermut Ataatsimiititaliamut ilisimatitsissuteqarnissamut Naalackersuisut *pisussaaffeqarput*. Taamaattumik oqaasertaliussap oqaasertalersorneqarneranut ilassutit ataatsimiititaliamit taaneqartup Naalackersuisunit ilanngunneqarsimannginnera ersarissumik amigaatitut - **assorsuarlu ajuusaarnartutut** - isigineqartariaqarpoq.

10.2.3 Missingersuutitut ilanngussat

Nuussineq Naalackersuisunit Aningaasaqarnermulluunniit Ataatsimiititaliamit akuersissutigineqarsimanersoq kontoni pingaarnerni ataasiakkaani nalunaarneqartarmat aallarniutigalugu oqaatigineqassaaq. Pisumi matuma kingornaniittumi siullermi Naalackersuisut ulloq akuersissutiginniffiat qulequttami nalunaarneqarsimavoq. Pisumi kingullermi Aningaasaqarnermut Ataatsimiititaliap suliamut normorititaa nalunaarneqarsimavoq.

Konto pingarneq 32.01.01 Peqqinnissaqarfiup Qullersaqarfia, allaffissorneq (19-03-2008)

Konto pingarnerup uuma taamatullu konto pingarnerup 70.01.01-ip, Ineqarnermut Attaveqarnermullu Pisortaqarfimmut tunngasup, tamarmik *apparneqarnerannik* missingersuutitut ilanngussap danskisuuani allaqqasoq kukkuneruvoq. Konto pingarneq kingulleq taaneqartoq qaffanneqarpoq.

Konto pingarneq 32.10.06 Peqqissaanermik Ilinniarfik (30-05-2008)

Aningaasaliissutit ikilinerat Aningaasaqarnermut Ataatsimiititaliamit ulloq 30. maj akuersissutigineqarsimasooq pillugu missingersuutitut ilanngussami allaqqasoq kukkuneruvoq. Aningaasaliissutinilli allannguneq Naalakkersuisut oqaasertaliussamik tunngaveqarlutik akueraat. Kukkuq ilanngussaq 1-imi aamma uteqqinneqarpoq, taassumalu kinguneranik aningaasaqarneq pillugu kisitsisit pingarnerit arlallit kukkuneqarput. Isumaliutissiissummi immikkoortoq 6.1 aamma 6.2.2 inner-suussutigineqarput.

Konto pingarneq 84.40.18 Atuarfiup illutai allat (08-370)

Aningaasaliissutit ikilisinneqarnerat Aningaasaqarnermut Ataatsimiititaliamit ulloq 30. november 2008-mi akuersissutigineqarsimanerannik allassimasooq kukkuneruvoq. Akuersineq pivoq ulloq 30. september 2008.

Konto pingarneq 89.72.12 Taartissanik inissialiortiterneq (08-374)

Suliassaq 060.34.504-imi (Tuapannguani suliassaq) aningaasaliissutit 2011-imi 12,9 mio. kr-inik ikilineqarnissaat siunertaralugu missingersuutitut ilanngussaq aningaasartaqanngitsooq ilanngunneqarpoq. Missingersuutitut ilanngussaq taanna kukkunikkut ilassutitut aningaasaliissutitut inatsisissatut siunnersuummut ilanngunneqarsimasorinarpoq, ukiunimi missingersuusiorfiusuni sanaartornermut aningaasaliissutinik nuussinerit sinneri 2009-mut aningaasanut inatsisissatut siunnersuummut ilanngunneqareermata.

10.3 Aningaasaliissuteqarnissamik suliassanut ataasiakkaanut oqaaseqaatit**10.3.1 Arctic Green Foodip sullissinissaq pillugu isumaqatigiissuteqarfigineqarnissaata akuerineqarnissaanik qinnuteqaat (08-308)**

2008-mi aningaasanut inatsisissatut siunnersuut pillugu taamani Aningaasaqarnermut Ataatsimiititaliaasoq november 2007-imi isumaliutissiissuteqarpoq. Sullissinissaq pillugu Arctic Green Food A/S-imut isumaqatigiissutitut aningaasartuutit inuiaqatigiinnut iluaqutissarsiffiusarnerat assut qularutigigini isumaliutissiissummi ataatsimiititaliap oqaatigaa. Tamanna tunngavigalugu ingerlatseqatigiiffiup sullissinissamik isumaqatigiissuteqarfigineranut akiliutit ukiut arlaqanngitsut ingerlaneranni annertuumik ikiliskkiartuaarneqartariaqartut aammalu tamanna aningaasanut inatsisissatut siunnersuummi siunniunneqartumit sukkanerusumik pissasooq ataatsimiititaliap taamani isumaqarpoq. Tamanna ataatsimiititaliap isumaliutissiissutaani sukumiisumik nassuiarneqarpoq. Tamatuma saniatigut oqaasertaliussamik Aningaasaqarnermut Ataatsimiititaliap siumoortumik aatsaat akuersissuteqarneratigut ingerlatseqatigiiffiup sullissinissaq pillugu isumaqatigiissuteqarsinnaanerannik aalajangersaasumik 2008-mi aningaasanut inatsisissatut siunnersuummut ilanngussisoqarpoq.

Sullissinissamik isumaqatigiissutissatut missingiusiaq akuerisassanngorlugi taamani Naalakkersuisuusut 2008-mi januarip aallartinnerani nassiuppaat. Sullissinissamut isumaqatigiissut taanna ataatsimut isigalugu Aningaasaqarnermut Ataatsimiititaliamit assut isornartoqartinneqarpoq. Taamaalil-lunilu sullissinissamut isumaqatigiissummut taarsiullugu sullississutigineqartussatut pisortanit piimasaqaataasut ajorluinnartumik nassuiaatigineqarsimasut ataatsimiititaliap isumaqarpoq. Tamatuma

saniatigut isumaqatigiissutissatut missingusiaq ersarissunik arlalinnillu kukkuneqarlunilu amigaa-teqarpoq. Kiisalu sullissinissamut isumaqatigiissutinut akiliutit 2008-mi aningaasanut inatsimmi annertussuserisaat aalajangiusimaniarneqarpoq, naak akiliutit taakku sukkanerusumik ikilisinnissaat Aningaasaqarnermut Ataatsimiititaliap isumaliutissiisummi siuliani taaneqartumi piumasarigalua-raa. Tamanna tunngavigalugu sullissinissamik isumaqatigiissummut atatillugu piunasaqaatinik a-peqqutinillu 21-inik Aningaasaqarnermut Ataatsimiititaliaq ulloq 17. januar 2008-mi nassiussivoq. Tamanna tusagassiuutitigut akerleriinnermik annertuumik pilersitsivoq, tassa Aningaasaqarnermut Ataatsimiititaliap pilertornerusumik akuersinissamut tatineqarnissaa siunertarigunarlugu tunisas-siorfinni arlalinni tunisassiassanik tunisinq tamatuma peqatigisaanik Arctic Green Foodimit matu-neqarmat.

Akissutertik sullissinissamullu isumaqatigiissut annikitsumik naleqqussagaq taamani Naalakkersui-suusut ulloq 29. januar 2008-mi nassiuppaat. Tamanna tunngavigalugu aalajangersimasunillu piunasaqaateqarluni nutaamik isumaqatigiissuteqarnissaq Aningaasaqarnermut Ataatsimiititaliap 2. februar 2008-mi akueraa, tamatumanili sullissinissamut isumaqatigiissummut akiliutit 1/12-inik ikilineqarput, tassa 2008-mi januarip qaammataani tunisinerup matoqqanerani. Tamatuma saniatigut sullissinissamik isumaqatigiissut qaammatini 12-ini atuuttussaq ataatsimiititaliap taamaallaat akue-risinnaavaa.

10.3.2 Danmarkimi nunanilu allani misileraatigalugu katsorsaannerumut aningaasaliissute-qarnissamik qinnuteqaat (08-313)

Danskit *second-opinionimik* taallugu aaqqissuussineraanni innuttaasut kalaallit peqataanissamut periarfissinneqarnissaat siunertaralugu 8 mio. kr.-inik ilassutitut aningaasaliissuteqarnissamik Naalakkersuisut qinnuteqaataat Aningaasaqarnermut Ataatsimiititaliamit ulloq 6. marts 2008-mi itigartinneqarpoq.

Nunatta aaqqissuussinermi tassani peqataanissaata Inatsisartunit ukiup siuliani itigartinneqarnera ataatsimiititaliap itigartitsineranut pingaarnertut tunngaviuvoq (UPA 07/140). Siunnersuutip taaneqartup itigartinneqarnissaanik Peqqissutsimut Ataatsimiititaliami amerlanerussuteqartut inassuteqartut taamani ilaatigut mianersoqqussutigaat aaqqissuussinermut aningaasartuutit annertoorujussuanngorsinnaasut, taamaattumillu apeqqut pillugu erseqqinnerusumik Inatsisartunut nassuiaasiortoqarnissaa kissaatiginartinneqarluni. Taama isummerneq Aningaasaqarnermut Ataatsimiititaliamit isumaqatigineqarpoq, taamaattumillu aningaasaliissuteqarnissamik qinnuteqaat itigartinneqarpoq.

Aningaasaqarnermut Naalakkersuisoqarfiup tusarniaanermut akissutaata qinnuteqaammut ilanngunneqarsimannginnera aningaasaliissuteqarnissamik qinnuteqaammi takuneqarsinnaasoq Aningaasaqarnermut Ataatsimiititaliap naggasiutigalugu oqaatigaa. Tamanna missingersuusiornermut malittarisassami aalajangersakkanut taamatullu periutsitut aalajangersakkanut naapertuutinngimmat taama iliorsimannginneq akuersaarneqarsinnaanngitsutut ataatsimiititaliamit isigineqarpoq.

Taamaattumillu naggasiutigalugu ataatsimiititaliaq ima oqaaseqarpoq:

“Tusarniaanermut akissutit ilanngunnagit nutaanik aningaasaliissuteqarnissamik aningaasaliissutiniluunniit allannguinnissamik qinnuteqaatinik siunissami tigusaqarnissani ataatsimiititaliap qanorluunniit akuersaarsinnaanngilaa.”

Qinnuteqaatip ataatsimiititaliamit itigartinneqarnerata kingorna danskit *second-opinionimik* taallugu aaqqissuussineraanni peqataanissamut napparsimasut nunatsinneersut periarfissinneqarnissaannik aalajangiiffigisassatut siunnersuut Inatsisartuni amerlanerussuteqartunit ulloq 14. marts 2008-mi

akuerineqarpoq (UPA 2008/96). Tamanna tunngavigalugu qinnuteqaat nutaaq ataatsimiititaliamit ulloq 9. april 2008-mi akuerineqarpoq (Suliaq 08-321).

10.3.3 Narsami toqoraavimmuut atasumik suliniutinut nutaanut sillimmatinit aningaasat atugassiissutigineqarnissaat (08-347)

Sullissinissaq pillugu Neqi A/S-imut isumaqatigiissuteqarnissamik Naalakkersuisut qinnuteqaataat Aningaasaqarnermut Ataatsimiititaliamit ulloq 9. juli 2008-mi akuerineqarpoq. Tamatumali peqatigisaanik sullissinissamut isumaqatigiissummi kukkusumik paragraffinut arlalinnik innersuussisoqartoq ataatsimiititaliamit oqaatigineqarpoq. Taamaattumillu kukkunerit taakku aaqqinneqarnissaat ataatsimiititaliamit kaammattuutigineqarpoq sullissinissamillu isumaqatigiissutip atsiukkap nuutinneqarnera qinnutigineqarluni. Taanna ulloq manna tikillugu nassiunneqanngilaq, taamaalillunilu sullissinissamik isumaqatigiissummik atsiukkamik pisariaqarneratullu iluarsisamik Naalakkersuisut nassiussinissaat ataatsimiititaliamit sulii utaqqineqarpoq.

Tamatuma saniatigut Neqimut piumasaqaatinik sullissinissamik isumaqatigiissummi aalajangersaa-soqarsimangitsoq Aningaasaqarnermut Ataatsimiititaliap aalajangiinnermini oqaatigaa. Taamani Namminersornerullutik Oqartussaasut akiliuteqarnissamut pisussaaffii kisimik sullissinissamik isumaqatigiissummi nassuiaatigineqarput. Tamanna ataatsimiititaliamit naammagineqanngilaq, taamaattumillu sullissinissamik isumaqatigiissut aqutugalugu akiliutigineqartunut taarsiullugu Neqip sullississutissaasa pisussaaffiisalu sullissinissamik isumaqatigiissutigineqartussami erseqqissarneqarnissaannik Naalakkersuisut qinnuigineqarput. Missingersuusiornermut malittarisassamut 2002-meersumut ilanngussaq 13 aamma innersuussutigineqarpoq.

Sullissinissaq pillugu Naalakkersuisut Neqimik 2010-mi nutaamik isumaqatigiissuteqarnissartik naatsorsuutigigaat ataatsimiititaliap ilisimavaa. Sullissinissamik isumaqatigiissutissap siulimisulli qarsupitsiginnginnissaa Naalakkersuisut piffissaagallartillugu isumagisimassagaat ataatsimiititaliap naatsorsuutigaa. Inatsisissatut siunnersuutip matuma aappassaaneerneqarnissaanut tamanna upper-narsaqqullugu Naalakkersuisut qinnuigineqarput, soorlutaaq pitsaaneruseqarsumik sullissinissamik isumaqatigiissuteqarnissaq pillugu manna tikillugu isumaqatigiinniarnert pillugit paasissutissanik pisarsinissaq Aningaasaqarnermut Ataatsimiititaliamit qilanaarneqartoq.

10.3.4 Peqqinnissaqarfimmuut ilassutitut aningaasaliissuteqarnissamik qinnuteqaatit (08-313, 315, 316, 321, 349, 355, 359, 360, 369, 374, 383 aamma 397)

Peqqinnissaqarfik 2008-mi 12-eriarluni ilassutitut aningaasaliiffigineqarnissamik qinnuteqarpoq. Aningaasaliissuteqarnissamillu tinnuteqaatit taakku ilaat arlallit 2008-mi aningaasanut inatsimmi sanaartornermut aningaasaliussat atugassiissutigineqarnissaannut tunngapput. Siusinnerusukkut allaqqasutut suliaq 08-313 ataatsimiititaliap itigartitsissutigaa. Aammalu suliaq 08-397 itigartinneqarpoq, tassa aningaasaliissutit atorineqareersut aningaasaliissuteqarnissamik qinnuteqartoqarnera ataatsimiititaliamit paasineqarmat. Aningaasaliissutit atorineqareerneranni aningaasaliissuteqarnissaq Aningaasaqarnermut Ataatsimiititaliamit akuerineqarsinnaangitsoq missingersuusiornermut inatsimmi allaqqavoq.

Ilassutitut aningaasaliissuteqarnikkut ingerlatsinerimut aningaasartuutinut naatsorsuutigineqanngitsunut ilanngaaseereerluni 17,5 mio. kr.-it ukiup ingerlanerani peqqinnissaqarfimmuut aningaasaliissutigineqarput. Tamatuma saniatigut taartaasartunut immikkut aningaasartuutinut sillimmatit 20 mio. kr.-it atugassiissutigineqarput. Kiisalu misileraatigalugu katsorsaanerup 8,9 mio. kr.-inik akeqartussatut taggineqartup aallartinneqarnissaa Inatsisartunit akuerineqarpoq, taakkulu peqqinnissa-

qarfimmut atugassiissutigineqarput. Tamatuma saniatigut 13,1 mio. kr.-inik ilassutitut aningaasaliissuteqarnissaq qinnutigineqarpoq, akuerineqarnanili (Suliaq 08-397).

Tamatuma saniatigut *sanaartornermut aningaasaliissutinut* atatillugu 69,5 mio. kr.-it ilassutitut aningaasaliissutigineqarnissaat akuerineqarpoq, taakkunungalu ilaapput aningaasaliissutissatut akuerineqareersunik atugassiissutiginninnerit. Sanaartornermut aningaasaliissutinik atugassiissutiginninnerit oqaaseqarnissamut pissutissaqalersitsinngillat, aningaasartuutimmi taakku ungasinneru-soq isigalugu Peqqinnissaqarfiup sipaaruteqarneranik nassataqarnissaat naatsorsuutigineqartariaqarmat. Tamatumani minnerunngitsumi pineqarput sulisunut inissianut tunngasut.

Ingerlatsinermulli tunngasuni aningaasaliissuteqarnissamik qinnuteqaatit taama amerlatiginerat isumakulunnarpoq. Taamaallunilu qulaarneqartutut isigineqartariaqarpoq Peqqinnissaqarfiup ingammik 2008-p ukiuata affaani kingullermi aningaasaqarnermik aqutsinerani ingerlatsinermut aningaasartuutit ingerlaavartut qanoq annertutiginerannik naammattumik ilisimasaqarnissaq qulakkeerneqarsimanngitsoq. Tamatuma nassatarisaanik ilassutitut aningaasaliissuteqarnissamik qinnuteqaatinik novemberip taamatullu decemberip qaammataani saqqummiussisoqarpoq. Taamaakkaluartoq katillugit 47,7 mio. kr.-inik akuersissutigineqanngitsunik atuinerussuteqarluni Peqqinnissaqarfiup 2008 qaangerpaa.

2009-mi taama atuinerussuteqartoqarnissaa pinngitsoorniarlugu Naalakkersuisut taamatullu Inatsisartut Peqqissutsimik Ataatsimiititaliaat misissuineramik iliuusissanillu ingerlatsisut Aningaasaqarnermut Ataatsimiititaliamit ilisimaneqarpoq. Aningaasartuutitigut tatisimaneqarnerup annikillisinneqarnissaanut suliasaqarfimmilu aningaasaqarnerup annertunerusumik ilisimasaqarfineqalernissaanut iliuutsit taakku iluaqutaajumaartut Aningaasaqarnermut Ataatsimiititaliap neriutigaa.

10.3.5 Qasigiannguani efterskolip suliariumannittussarsiuunneqarnerata kingorna ilassutitut aningaasaliissuteqarnissamik qinnuteqaat (08-370)

Qasigiannguani efterskolip sananeqarnissaanut 11,6 mio. kr.-inik ilassutitut aningaasaliissuteqarnissamik 2008-mi septemberimi Naalakkersuisut Aningaasaqarnermut Ataatsimiititaliamut qinnuteqarput. Qinnuteqaat arlalinnik ersarissunik kukkuneqartoq paasineqarpoq, tamatumalu Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisup Aningaasaqarnermut Ataatsimiititaliamik salloqittaaniarsarisimanera pasinarsisippaa. Tamatuma saniatigut qinnuteqaatip pitsaassusia ajorluinnarsimavoq.

Tamanna Aningaasaqarnermut Ataatsimiititaliamit sakkortuumik uparuarneqarpoq, tassungalu atatillugu Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfiup aningaasaliissuteqarnissamik qinnuteqaammik ilusiliisup ingerlatsineranik kukkunersiunermik aallartitseqqullugu Inatsisartut Kukkunersiunermut Ataatsimiititaliaat qinnuigalugu. Ingerlatsinermik kukkunersiuneq Deloittemit ingerlanneqarpoq, taassumalu Aningaasaqarnermut Ataatsimiititaliamit uparuarneqartut isumaqatigai. Naalakkersuisunut ilaasortat atorfilittalluunniit inatsisit malillugit akisussaatinneqarsinnaanerannik naliliinissaq siunertarlugu inatsisilerinikkut misissuineramik aallartitsisoqassasoq kukkunersiuisup kaammattuutigaa. Tamatuma saniatigut KIIIN-imi ingerlatsinermik kukkunersiulluni siusinnerusukkut misissuineq kukkunersiuisup innersuussutigaa, tamatumani pissutsit ajornartorsiutitaqartut sulii aqqinneqarsimanngitsut kukkunersiuisumit tikkuavigineqarluni.

Nunatta karsiata 2007-imut naatsorsuutaanik Inatsisartut aappassaaneerinerat tunngavigalugu taamani Naalakkersuisut siulittaasorisat inatsisilerinikkut misissuineramik aallartitsinissamik nammi-

neq aalajangerpoq. Misissuineq taanna eqqartuussissuserisumik Ole Spiermannimit ingerlanneqarpoq. Ilisimasat malillugit misissuineq 1 mio. kr.-it sinnilaarlugit akeqarsimavoq.

Ole Spiermannip misissuina 20. april 2009-mi naammassineqarpoq. Missingersuusiornermut inatsimmi aalajangersakkanik marloriarluni unioqqutitsisoqarsimasoq, missingersuusiornermut malittarisassani piumasaqaatinik ataasiarluni unioqqutitsisoqarsimasoq kiisalu sulianik pitsaasunik ingerlatsinissamik ileqqussat ataasiarluni unioqqutinneqarsimasut misissuinermi ilaatigut inerniliunneqarpoq. Tamatuma saniatigut kukkuluttortoqarlunilu kukkusumik naliliisoqarsimasoq tikkuaavigineqarpoq. Naalackersuisulli eqqartuussissuserisuat malillugu kukkunerit amigaatillu taakku katillutik ima annertutiginnillat eqqartuussiviit aqutigalugit akisussaatisinissamut tunngavigineqarsinnaallutik. Naalackersuinikkut suliaqartunik akisussaatisisoqarsinnaanersoq soorunami isummerfigineqanngilaq.

Tamakku saniatigut Aningaasaqarnermut Ataatsimiititaliap sulineranut soqutiginaatillit marluk eqqartuussissuserisup misissuineranit inerniliunneqarput:

1. Naalackersuisut aningaasaliissuteqarnissamik september 2008-mi qinnuteqaataannik suliarinninnermini qinnuteqaat itigartiinnarnagu qinnuteqaammi amigaatit paasineqartut pillugit Naalackersuisunut arlalinnik apeqquteqarnissani Aningaasaqarnermut Ataatsimiititaliap toqqarpaa. Ataatsimiititaliap taamaaliornermigut Naalackersuisut atorfilittaasaluunniit eqqartuussiviit aqutigalugit akisussaatinneqarsinnaanerannut periarfissat killilera i eqqartuussissuserisoq isumaqarpoq. Tamatuma kingunerisaanik siunissami aningaasaliissuteqarnissamik qinnuteqaataajumaartut ataatsimiititaliap piumasaqaataanik eqquutsitsinnigitsut amigaataannik qulaajaanermik nammineq ingerlatsinani utertillugit nassiunneqartalernissaat Aningaasaqarnermut Ataatsimiititaliamit isumaliutigineqartariaqarpoq.
2. Naalackersuisut missingersuusiornermut malittarisassa at missingersuusiornermut inatsimik tunngaveqarput aammalu malittarisassat ilaatigut siunertaraat Aningaasaqarnermut Ataatsimiititaliap aalajangiinissamut tunngavissaqarnissaata qulakkeerneqarnissaa. Tamannarpiarlupissutigalugu kaajallaasitaliortoqarsimagaluarpalluunniit Aningaasaqarnermut Ataatsimiititaliap immikkut ilisimateqqaarnagu Naalackersuisut malittarisassat imaaliillaanaq sanioqqussinnaanagillu immikkut akuersissuteqarfigisinnaanngilaat aammalu tamanna aatsaat pisinnaalluni tamatumunnga tunngavilersuutissaqarpat. Tamanna tunngavigalugu aningaasaliissuteqarnissamik qinnuteqaatit ilusissaannut piumasaqaatit Aningaasaqarnermut Ataatsimiititaliamit erseqqissaatigineqarput, taamaalillutillu aningaasaliissuteqarnissamik qinnuteqaatinut atatillugu missingersuusiornermut malittarisassani aalajangersakkat saneqqunneqarnissaat akuersissutigineqarsimatillugu tamanna Naalackersuisunit pinerit tamaasa oqaatigineqartassalluni. Ataatsimiititaliap taama piumasaqarnera Naalackersuisuusimasunit akuersaarneqarpoq.

11. Aningaasaqarnermut Ataatsimiititaliap kaammattuutai

2008-imi ilassutitut aningaasaliissutinut inatsisissatut siunnersuummik kiisalu Naalackersuisut aningaasaliissutinut allannguutissatut siunnersuutaannik suliarinninnermini taakkunanngalu malitseqartitsisarnermit misilittakkani tunngavigalugit Naalackersuisunut **kaammattuutinik** arlalinnik ukuninnga saqqummiussinissaminut Aningaasaqarnermut Ataatsimiititaliap pissutissaqarsorivoq:

Kaammattuut nr. 1

Kingumut atuutilersussanngorlugit nuussinissat malittarisassatut pingaarnertut isigalugu akuersissutigineqartannginnissaannik Aningaasaqarnermut Naalakkersuisoq Aningaasaqarnermut Ataatsimiititaliamit **kaammattorneqarpoq**. Aningaasaliissutinik allannguinnissamik akuersissuteqartoqassatilugu aningaasat atorneqareerneranni akuersissuteqannginnissaq pinerit tamaasa qulakkeerneqartariaqarpoq.

Kaammattuut nr. 2

Missingersuutinik qaangiinissaq pinngitsoorneqarsinnaanngitsoq erseqqitsillugu nunatta karsiata naatsorsuutaasa kusassarneqarnissaat siunertariinnarlugu ukiumi aningaasanut inatsisit atuuffiata naalernerani nuusserit ingerlanneqartannginnissaannik Naalakkersuisut Aningaasaqarnermut Ataatsimiititaliamit **kaammattorneqarput**. Taamaattoqartillugu aningaasaliissutinik nuussinnaati-taanerminnik Naalakkersuisut atuinngitsoorluarsinnaapput, tassungalu taarsiullugu nuussinissamik qinnuteqaammik Aningaasaqarnermut Ataatsimiititaliamut saqqummiussillutik. Tassunga taarsiul-lugu missingersuutinik qaangiinermut pissutaasoq nunatta karsiata naatsorsuutaanut atatillugu naatsorsuutitut nassuiaatini ersarissarneqarsinnaavoq.

Kaammattuut nr. 3

Ilassutitut aningaasaliissutinut inatsisini ukiuni arlalinni kukkunerusartoq uteqattaarneqarqunagu 2009-mi ilassutitut aningaasaliissutinut inatsisissatut siunnersuut saqqummiunneqartinnagu siunnersuummi § 1-imi nassuiaatit kukkunerisiorneqarnissaat qulakkeeqqullugu Naalakkersuisut Aningaasaqarnermut Ataatsimiititaliamit **kaammattorneqarput**. Isumaliutissiisummi matumani immikkoortoq 10.2.1 innersuussutigineqarpoq.

Kaammattuut nr. 4

Ilassutitut aningaasaliissutinut inatsimmi *missingersuutinut ilanngussat* aningaasaliissutinik allanngortitsinermut tunuliaqutaasumik nassuiaatitut ilassutitut aningaasaliisummi kisimik uppernarsaatitut ilanngunneqartarmata, missingersuutinut ilanngussat tamatuma kingorna Inatsisartunit innuttaasunillu, Naalakkersuisut isummernissaannut tunngavissianik ikorfartorneqaratik, atuarneqarlutil-lu paasineqarsinnaasuunissaat Aningaasaqarnermut Ataatsimiititaliamit assut pingaartinneqarpoq. Naalakkersuisut missingersuusiornermut malittarisassiaanni allassimasut ulluinnarni malinneqartartuuppata missingersuutinut ilanngussat naammaginartuusimassagunaralarput, taamaattumik missingersuusiornermut malittarisassami aalajangersakkanik malinninnissamik Naalakkersuisut Aningaasaqarnermut Ataatsimiititaliamit **kaammattorneqassapput**.

12. Aningaasaqarnermut Ataatsimiititaliap inassuteqaatai

Ilassutitut aningaasaliissutinut inatsisissatut siunnersuutip aappassaaneernissaanut pingajussaaneernissaanulluunniit inatsisissatut siunnersuummut matumunnga allannguutissatut siunnersuummik saqqummiusseqqullugit Naalakkersuisut Aningaasaqarnermut Ataatsimiititaliamit isumaliutissiisummi kaammattorneqarput.

Paasinnineq isumaliutissiisummi allaqqasoq naapertorlugu inatsisissatut siunnersuut akuersissutigineqassasoq Aningaasaqarnermut Ataatsimiititaliap isumaqatigiittup inassutigaa.

Taama oqaaseqarluni Inatsisartut Aningaasaqarnermut Ataatsimiititaliaata Inatsisartut 2008-imi ilassutitut aningaasaliissutinut inatsisissaattut siunnersuut aappassaaniigassanngortippaa.

Niels Thomsen

Naaja Nathanielsen,
siulittaasoq

Finn Karlsen

Per Berthelsen

Aqqaluaq Egede